

## CAPUT III.

## DE LEGE POSITIVA HUMANA.

## ARTICULUS I.

*De Potestate legislativa humana generatim.*

82. *Nota 1.* Sicut præter legem divinam ad gubernandam rite Ecclesiam necessario in terris a Christo relieta fuit potestas ferendi leges ecclesiasticas : ita præter legem naturalem ad ordinandam rite rempublicam profanam necessaria est potestas ferendi leges civiles; de utraque distinctius agendum, et quidem contra Wickleff., Huss, Luther., Calvinum et horum asseclas, qui potestatem *ecclesiasticam*, item contra Waldenses et Anabaptistas, qui potestatem etiam *politicanam* proterve calumniantur.

Definitur autem *lex humana*, ordinatio rationis a potestate humana legitima ad bonum commune promulgata : si ad bonum spirituale ac supernaturale, dicitur *ecclesiastica*, si ad politicum ac naturale bonum ordinatur, *lex civilis* dicitur.

Dividitur universim in *scriptam*, seu litteris consignatam, ut sunt *Rescripta*, et in *non scriptam* sola voce vel usu introductam, qualis est *Consuetudo* : in *imperativam*, quæ præcipit vel prohibet aliquid, estque vel affirmativa vel negativa, et in *permessivam*, quæ actum præcise tolerat, si non sit malus, vel poenam dissimulat, si malus sit; multi tamen negant dari legem seu jus proprio permissivum, cum permissione non sit lex, sed silentium legis, obligatio autem, quæ in aliis oritur, ne te impediant in usu libertatis tuæ circa rem permissam, oriatur ex lege naturali negativa : in *favorabilem*, quæ primario prodest aliquibus, licet aliis secundario fortassis noceat, v. g. leges de dote, causa pia, percussione clerici : et in *odiosam*, quæ primario intendit incommodeum seu poenam, quamvis redundet in bonum commune, v. g. leges tributorum et vectigalium ; odia vero restringenda et favores ampliandi sunt, Reg. 13. de R. J., et in dubio lex censenda est favorabilis, quia de Principe beneficium potius, quam odium est presumendum : in *pure præceptivam*, *pure paenalem* et *mixtam* : in *prohibentem* tantum et in *irritantem*, de quibus deinceps : demum in *publicam* et *privatam*, quarum hæc in privatorum, illa in bonum communitatis vergit.

II. Triplex hic occurrit quæstio : 1<sup>a</sup>. sitne lex humana ipsa duntaxat lex *naturalis* magis evoluta, id quod nonnulli recentiores autuant? 2<sup>a</sup>. an potestas legislativa inferat *inæqualitatem hominum* legi nature aut gratiae repugnantem, quam hereticorum ex ea inferri criminabantur? 3<sup>a</sup>. utrum ferendarum legum humanarum potestas etiam in *improbis* perseveret, contra Wickleffum et Joannem Huss, qui eam solis fidelibus et justis permittebant?

83. *Dico I.* Lex humana, sive ecclesiastica, sive civilis, non est lex *mere naturalis* applicata.

*Prob. 1<sup>a</sup>. pars.* Vera Religio, cui observandæ ac propagandæ deserviunt leges ecclesiasticae, est supernaturalis quoad pleraque tum credenda, tum agenda; ergo imprimis *vera religio* non est ipsa lex naturalis magis evoluta. Deinde *præcepta Ecclesiae*, quamvis jus divinum hinc inde ad certum tempus, aliamve circumstantiam determinent et applicent, propterea non dicuntur *præcepta divina*, quod constat in *præcepto confessionis annuae*; ergo multo minus *præcepta naturæ* sunt.

*Prob. 2<sup>a</sup>. pars.* Lex civilis debet ac potest esse conformis juri naturæ, si sit *honesta*, h. e. non repugnans rectæ rationi, *justa*, h. e. spectato fine, agente et forma legis honeste lata, *utilis*, h. e. quæ pro tempore, quo fertur et obligat, prudenter profutura, nec certo obfutura cognoscitur, quin propter hanc conformitatem cum lege naturæ dicatur ipsa lex naturæ; vel certe cum lex naturæ sit *immutabilis*, et ratio naturalis passim *obvia*, lex nulla civilis unquam a jure canonico aboleri aut corrigi, neque Doctores maximi in assignanda legum ratione tantopere a se invicem dissidere potuerint. *Conf.* Lex naturæ et lex humana inter se differunt quoad originem, objectum, subjectum et finem; vide dicta de *jure gentium* num. 37; ergo.

84. *Dico II.* Potestas legislativa humana non repugnat *libertati* hominum, seu naturali, seu christianæ.

*Prob. 1<sup>a</sup>. pars.* Homo, cum jus naturæ nec prohibeat subjectionem, nec præcipiat libertatem, utpote ad naturæ finem non determinate necessariam, nascitur saltem subjcibilis : homo ceu animal natura sociale nascitur propensus ad civilem societatem : homo, que provida Dei ordinatio est ad conciliandam inter homines pacem et charitatem, maxime indigit humana societate ad congruam hujus vitæ conservationem; ergo actu subjici potest, et non esse liberum juri nature haud repugnat. *Prob. C.* Quam parum communitas sine pace et justitia, tam parum pax et justitia sine gubernatore, qui potestate præceptiva et coactiva polleat, conservari potest, prout testantur Scriptura S. Prov. 11. 14. *ubi non est gubernator, populus corruet*, S. AUG. et D. THOM., Philosophus, et ipsi adeo Ethnici : cum talis communitas esset corpus sine capite, navis sine rectore, exercitus sine duce; ergo inæqualitas hominum qua imperantium, qua subditorum adeo non est aduersa juri naturæ, ut sicut in statu *conjugali* superioritas mariti, et potestas patria parentis ex jure naturæ oritur, illa saltem in statu *herili* et *civili* inæqualitas juri naturæ sit consentanea.

*Prob. 2<sup>a</sup>. pars.* Libertas christiana est libera servitus, *libera*, quia ex amore et charitate potius, quam ex timore servili, at servitus tamen, quia potestatis sublimioribus subdita propter Deum, cum non sit potestas, nisi a solo Deo; quamvis ergo eximat fideles vel a jugo legis mosaicæ, vel a timore servili, neutiquam vero a justo hominum imperio, divinitus concessa una cum coactione ad vindicanda mala contra pacem, justitiam, aliasque virtutes commissa : vide num. 69. de *lege evangelica*.

*Conf.* Christus Luc. 20. et Matth. 22. docens : *reddite ergo, quæ sunt Cæsaris, Cæsari, et quæ sunt Dei, Deo*; item jubens Matth. 17. pro se et Petro tributum reddi, verbo et facto confutavit errorem *Jude Galilæi*, qui

teste S. Hier. Christo et Apostolis coœvus multis persuasérat, nullum debere Dominum vocari præter solum Deum, et eos, qui ad templum decimas deferrent, Cæsari tributum non reddere. Idipsum docent Apostolorum principes, PETRUS ep. 1. c. 2. v. 13., PAULUS ad Rom. 13. 1.; item SS. PP., IREN., JUSTIN., AUC., etc.; ergo regimen humanum non repugnat christianae libertati, quam potius juvat, et cuius defectum supplet per coactionem.

85. Obj. Homo natura liber est, nec cuiquam, nisi creatori obnoxius; ergo potestas imponendi leges repugnat ordini nature.

Conf. Principatus inter homines ex peccato ortus et per tyrannidem introductus est, uti de NEMROD Gen. 10. 8. dicitur: *ipse cœpit esse potens in terra...* Fuit autem principium regni ejus Babylon: et de ALEXANDRO ait LUCANUS, fuisse felicem terrarum pœdonem; ergo legitima non est Principum potestas.

R. Homo natura liber est, sicut bona olim natura erant *communia*; at sicut divisio bonorum non repugnat juri naturæ, ita nec subjectio hominum, quia sicut communio bonorum non determinate requiritur ad felicitatem nature, ita nec libertas hominum; neutra ergo est jure naturæ præcepta. Quin hoc ipso, quod homo vivere velit vitam socialem, eeu membrum societatis subditur ejusdem capiti ac rectori, qui ex officio intendit bonum communitatis: fere sicut uxor marito, filius patri, supposita generatione vel pacto conjugal, subjicitur.

Ad Conf. D. A. Principatus ex peccato ortus est quoad vim directivam N. nam inter Angelos etiam ordo aliquis et principatus est, fuisseque inter homines in statu innocentie aliqua superioritas directiva. Quoad vim coactivam Tr. quia ne haec quidem in peccato fundatur, quamvis pro exercitii sui necessitate præsupponat aliquam deordinationem. Cæterum potestas regia per se nec est a tyrannide, neque cum tyrannide, ut videre licet in Israëlitarum Regibus, et ante istos in MELCHISEDECH, JOB, ABRAHAM et aliis; ab auctoritate paterna initium duxisse videtur regia paternæ tunc simillima. Equidem per vim et injuriam primus vicinas ditiones invasisse dicitur NEMROD, cuius ambitionem multi exinde sunt imitati; verum ea cupiditas et iniquitas est ex abuso regiae dignitatis, ad intrinsecam ejus rationem non pertinet.

Inst. 1. S. AUC. L. 19. de Civ. expendens illa verba Gen. 1. faciamus hominem... ut præsit piscibus maris, volatilibus caeli, bestiis terræ... rationalem factum ad imaginem sui, inquit, noluit Deus nisi irrationalibus dominari, non hominem homini, sed hominem pecori. GREG. M. L. 21. Moral. c. 10. docet, homines cunctos natura æqualiter genitos, diversitatem accepisse ex virtute; ergo contra creatoris voluntatem ipsamque naturam est suprema auctoritas.

R. N. C. Nam 1º. S. AUC. non loquitur de potestate Principum in subditos, sed de dominorum in servos dominatu; *conditio servitutis*, inquit, *jure intelligitur imposta peccatori*. Deinde non ait hunc dominatum esse contra creatoris voluntatem supposito peccato, sed tantum contra primam ejus intentionem ante peccatum; addit quidem, homines magis *pastores pecorum*, quam *reges hominum* fuisse constitutos, ut hinc insinuaret Deus, quid ordo postularet creaturarum, et quid etiam meritum exigeret peccatorum: verum non agit de dignitate regia, sed de illius abuso, quo principes quidam sub-

ditos suos instar mancipiorum habent, contra quem abusum L. 5. c. 12. dixerat: *Rex dicitur a regendo et consulendo, non a regnando et dominando*.

2º. S. GREG. vel de eodem abuso loquitur, cum ibidem dicat: *nam contra naturam superbire est, ab æqualibus (natura et specie humana) velle timeri*; aut intelligit principatum non simpliciter cum vi dirigendi, sed adjuncto terrore et vi cogendi, quam peccatum efficit necessarium.

Inst. 2. Regnare et leges ferre, solius Dei est, 1. Cor. 8. 6. *unus Dominus*, Jacob. 4. *unus est enim legislator et iudex*; hinc Oseea 8. 4. dicitur: *ipsi regnaverunt, et non ex me: principes extiterunt, et non cognovi eos*; ergo nulla est inter homines regnandi potestas nec participata, quia 1. Cor. 7. 23. ait Apost., *pretio empti estis, nolite fieri servi hominum*.

R. 1º. D. A. Regnare cum supra et independenti potestate C. cum potestate divina subdita N. Dei solius est, regnare legesque condere potestate sibi propria et essentiali a nemine accepta, nemini obnoxia; is primi textus est sensus, idem et secundi, statim enim additur: *qui potest perdere et liberrare, in æternum scilicet*. Præterea τὸ unus non tam singularitatem, quam identitatem judicis ac legislatoris significat, ad excludenda temeraria hominum judicia; unde subditur: *tu autem quis es, qui judicas fratrem tuum?* Oseeas loquitur de Regibus Israel præter voluntatem Dei introductis, quos sibi populus contra primam Dei institutionem per rebellionem constituerat: vel τὸ non regnare ex Deo, idem est, ac non regnare secundum voluntatem Dei, aut non ex ordinatione Dei, sed ex mera permissione, quæ quidem de omnibus tyrannis, Regibus iniquis, aut ineptis ad regnandum applicari possunt: vel denique increpantur Reges Israel, quod regia potestate abuterentur ad populum avertendum a Deo ad idola, hoc quippe est *regnare non ex Deo*, et statim additur: *argentum suum et aurum suum fecerunt sibi idola, ut interirent*.

R. 2º. N. C. Nam Apostolus 1. c. jubet, homines sub alterius potestate constitutos non hominibus propter homines, sed in hominibus Christo servire qui tanto nos pretio redemit, ac sibi mancipavit: aut eos, qui libertate fruuntur, deterret ab ea cuiquam obstringenda propter salutis pericula et impedimenta, quæ præsertim id ætatis ex conditione servitus nascebantur.

86. Dico III. Potestas legislativa seu politica seu ecclesiastica perseverat etiam in improbis.

Prob. 1ª. pars. Apostolus ad Rom. 13. jubet obtemperare hominibus in potestate constitutis, qui tunc temporis erant infideles: talibus etiam in Christianos sœuentibus parebant summa religione Christiani in omnibus, quæ divinæ legi non adversarentur. Similiter in antiqua lege Regibus a morum atque etiam a fidei rectitudine deflectentibus sua permanebat auctoritas; et ante datam legem JOSEPH Gen. 47. PHARAONI idolorum cultori terras Ægypti fecit tributarias; ergo.

Conf. Bono publico et communi capitaliter repugnat, ut potestas illa pendeat a fide vel moribus Principum, quia cum alterius mens et animus nemini pateat, vix illum valere præceptum constaret, si illorum validitas ex legislatoris fide ac moribus suspensa esset.

Prob. 2ª. pars. Ecclesiasticam potestatem quæcumque Scripturæ loca adstruunt, eam sine ulla exceptione, sine apposita probitatis conditione stabi-



liunt; ergo hæc non est apponenda. *Prob. C.* Restrictio non sunt sacri textus testimonia, quæ restringi non postulat vel auctoritas, vel manifesta ratio, neque etiam aut alia Scripturæ loca, aut Traditio, aut Ecclesiæ praxis vel definitio significat esse restringenda; quin potius restrictioni huic adversantur; ergo potestas ecclesiastica talis non est, quæ nequeat in improbis permanere, aut per improbos rite valideque exerceri: non enim e re Ecclesia est, ut Pastorum auctoritas per improbitatem ipsorum extinguitur, tum quia regimen ejus non foret satis conspicuum, tum quia spernendarum Ecclesiæ legum frequens praetextus occurreret.

*Conf. Matth.* 23. ait Christus: *Super cathedram Moysi sederunt Scribæ et Pharisei; omnia ergo, quæcumque dixerint vobis, servate et facite; secundum opera vero eorum nolite facere: dicunt enim, et non faciunt;* ergo cathedrae, h. e. docendi et præcipiendi auctoritas non minuitur per improbitatem insidentium cathedrae. Quamvis autem de antiquæ legis Pontificibus ac ministris sermo sit; ea tamen quoad nostros ratio valet. Adde censuram hujus articuli, qui est WICKLEFFI 13., et a Constantiensi Synodo Sess. 8. reprobatus: *Nullus est Dominus civilis, nullus Prælatus, nullus Episcopus, dum est in peccato mortali.*

87. *Obj Eccl.* 10. dicitur: *regnum a gente in gentem transfertur propter injusticias;* ergo mali Principes amittunt potestatem politicam; imo non potest Deus hanc improbis potestatem tribuere, tum quia sunt inimici Dei, tum ne abusum potestatis approbare videatur: propterea SAUL ut malus evasit, a Deo reprobatus est, 1. Reg. 13.; ergo carent potestate, quæ non est nisi a Deo.

R. N. C. Nam 1º. textus citati sensus est, divinam efficere providentiam, ut contra injustos dominatores ingruant hostes, qui devictos regno ejicant. 2º. Deus etiam inimicos suos muneribus et donis afficit, Matth. 5. 45. *solem suum oriri facit super bonos et malos* etc. 3º. Improbi etiam potestate sua recte uti possunt, eaque non conceditur a Deo, ut illa abutantur, sed ob fines dignos sapientia, bonitate ac justitia divina. Demum a SAUΛE non valet argumentum ad ceteros, tum quia SAUL fuerat a Deo proxime Rex electus, non ita ceteri: tum quia SAUL etiam diu, postquam factus fuit improbus, regnare persistit: tum quia nisi Deus ita expresse statuisset, licuisset nemini SAULIS auctorati propter ejus improbitatem se subducere, atque ipse DAVID divinitus illi designatus successor aggressus non est eum throno deturbare.

*Inst. 1.* Quæ sunt, a Deo ordinata sunt, ad Rom. 13.; ergo impiorum potestas non est a Deo: unde Apostolus obsequium erga tales Principes solum commendat, vel ut evitentur majora incommoda, vel tanquam aliquid perfectius, non vero illud imperat.

R. *Ad 1.* Ea lex, quam nonnulli afferunt, nec Vulgatae, nec grecis Codicibus consonat, utrobique sequitur: *quæ enim sunt (potestates) a Deo ordinatae sunt;* ita legendum esse patet tum ex serie, itaque qui resistit potestati, *Dei ordinationi resistit,* tum ex circumstantiis temporum in quibus ea jubebat Apostolus, cum scilicet Principes et Magistratus essent infideles. Itaque non a vita Principum inordinata, sed a Deo pendet Principum potestas, in qua nihil inordinatum.

*Ad 2. N. A.* Utraque interpretatio revertitur, tum per contextum: *necessi-*

*tati igitur subditi estote;* insert Apostolus, *non solum propter iram, sed etiam propter conscientiam;* tum Christianorum praxi, qui persecutionum tempore facile potuerint in Principes Religionis hostes rebellare, stragemque imperio inferre, ut testantur TERTULL. Apolog. c. 33., et S. GREG. Naz. orat. 3. in Julian. Apost.

*Inst. 2.* S. AUG. L. 19. de Civ. c. 21. negat apud infideles posse esse justitiam, iura, verum populum aut rempublicam; ergo per infidelitatem amittitur suprema potestas: hæc enim improborum potestas bono communi nequaquam conductus.

R. N. C. Nam 1º. S. Doctor, ut saepe alias, intelligit veram justitiam, vera iura ea, quæ ad æternam vitam perducant, uti L. 4. cont. Julian. c. 3. — 2º. Multo minus bono communi conductus, ut ex privata Principis probitate ac fide penteat suprema potestas: cui enim perdito civi ac novarum rerum cupido non promptum sit, hoc vel illud Principis vitium suæ perduellioni praetexere?

*Inst. 3.* Potestas ecclesiastica est *supernaturalis;* ergo in improbis non perseverat: est ad regendam *Christi sponsam;* ergo inimicis Christi ea non concreditur: est in *ædificationem,* sed in improbis potius foret ad *destructio-* nem; ergo per improbitatem ea perdeatur.

R. N. C. Tum quia supernaturalia dona illa, quæ vocantur gratis data, h. e. quæ sunt in aliorum magis quam habentis utilitatem, non amittuntur per peccatum; ejusmodi autem donum est potestas ecclesiastica: tum quia Christus in utilitatem suorum etiam inimico uti potest: tum quia malus etiam legislator potest commissa sibi potestate non abuti; certior autem foret pernicies, si justa etiam peccatorum imperia detrectare licitum esset. Non tamen negandum, quin probis et justis *convenientius* conferatur ecclesiastica jurisdictione, cum res integra est.

*Inst. 4.* Saltem per *hæresin* aut *infidelitatem* amittitur ecclesiastica potestas; ergo.

R. 1. De hæresi vel infidelitate *mere interna* hoc dici non potest ob easdem rationes, quæ probant potestatem illam non amitti per quodcumque aliud mortiferum peccatum. 2. Si hæresis vel infidelitas *externa* quidem sit, sed *occulta* maneat, probabilius quoque est, non propterea jurisdictionem amitti; equidem in excommunicationem incurrit, at postulat tamen bonum Ecclesie, ut, quamdiu *occulta* manet hæresis, censurae hujus suspendatur effectus quantum ad jurisdictionis amissionem: nisi dicere malis, ipsam interire jurisdictionem, valere tamen illius actus, eo quod Ecclesia illam ad actus ejusmodi transeunter conferat, aut supplet ejus defectum, quod nonnulli asserunt. 3. Si hæresis vel infidelitas fuerit non tantum externa, sed *manifesta* etiam, v. g. in Episcopo, iterum distinguendum videtur: aut enim is toleratur, aut non toleratur: si *secundum*, jurisdictione spoliatur saltem vi excommunicationis huic criminis annexæ: si *primum*, vel ex tacito Ecclesie consensu suspensus remanet excommunicationis effectus quoad jurisdictionis privationem, vel certe jurisdictionis defectus ab Ecclesia suppletur saltem quoad acta ex jurisdictione pendentia, quæ cedunt in gregis innocui commodium et favorem. Alterutrum fieri videtur exposcere pietas Ecclesiæ et fidem, quibus non alter præficitur pastor, necessitas longe præpollens ratione,

quæ adduxit Ecclesiam, ut in Constantiensi Concilio permitteret communicationem cum excommunicatis non denuntiatis.

*Inst. 5.* Fides est fundamentum spiritualis ædificii; ergo et spiritualis potestatis: atque ideo negant SS. PP., hæreticis esse posse in Ecclesia jurisdictionem: S. CYPR. ep. ad Magnum ait: *Dicimus omnes omnino hæreticos et schismaticos nihil habere potestatis ac juris: S. Cœlestin. 1. ep. ad clerum et populum Constantinopolitanum, inquit: Si quis ab Episcopo Nestorio, aut ab aliis, qui eum sequuntur, ex quo talia prædicare cœperunt, vel excommunicatus est, vel exodus, seu antistitis seu clericorum dignitate, hunc in nostra communione et durasse et durare manifestum est, nec judicamus eum remolum: quia non poterat quemquam removere ejus sententia, qui se jam præbuerat ipse removendum; quæ verba tanquam regulam ab Apostolica Sede sancitam refert NICOLAUS I. ep. 7. ad Mich. Imp.; ergo invalidi sunt hæreticorum actus juridici.*

*R. Ad 1. D. A.* Fides est fundamentum spiritualis ædificii, h. e. internæ justitiæ ac donorum, quæ illam comitantur C. h. e. donorum et gratiarum, quæ per se spectant ad salutem cœterorum N. ad hæc enim seu recipienda seu retinenda sufficere potest baptismi character.

*Ad 2. D. A. SS.* Patres negant jurisdictionem posse competere hæreticis ab Ecclesia rescissis C. in Ecclesia adhuc aliqua ex parte hærentibus, ut sunt hæretici occulti, atque etiam publici, sed tolerati N. Nihil contra probant allati textus: S. Cypr. loquitur de hæreticis et schismaticis in separata secta constitutis, coque argumento utitur ad firmandam suam opinionem de illis iterum baptizandis, cum redeunt ad Ecclesiam: S. Cœlestin. pronuntiat quidem, invalidos fuisse jurisdictionis actus a Nestorio ejusque sequicibus tentatos; sed 1<sup>o</sup>. non loquitur de actibus illis, qui erant in gregis commodum et favorem, sed de iis tantum qui erant a coactiva potestate: 2<sup>o</sup>. declarat tempus, ex quo cœperunt irriti esse actus isti, non esse illud, quo eorum auctores male de fide senserunt, sed illud, quo perversa sensa prædicare cœperunt, quod manifestationem hæresis indicat.

## ARTICULUS II.

## DE POTESTATE LEGISLATIVA CIVILI.

88. *Dico.* Princeps politicus, aut qui in republica gaudet supra auctoritate, habet potestatem ferendi leges civiles ac politicas.

*Prob. 1. ex Script. Prov. 8. per me Reges regnant, et legum conditores justa decernunt; Matth. 22. Christus de tributis ex Principiis lege pendendis, redite, inquit, quæ sunt Cæsar, Cæsari; ad Rom. 13. Apostolus, omnis anima, inquit, potestatis sublimioribus subdita sit: non est enim potestas, nisi a Deo; que autem sunt, a Deo ordinatae sunt. Itaque qui resistit potestati, Dei ordinationi resistit; qui autem resistunt, ipsi sibi damnationem acquirunt; ergo Principum, seu supremæ in republica auctoritatis potestas a Deo manat, atque ad sancandas leges extenditur.*

*Prob. 2. Ex Traditione. S. JUSTIN. Apol. 1. ad Antonin. Imp. vectigalia sane, ait, et collationes eis, qui a vobis ordinati sunt, exactoribus præ omnibus ubique inferre contendimus, quemadmodum a Christo sumus instituti.*

*TERTULL.* in apologet., ORIG. L. 1. et 9. cont. Celsum, cœterique christianæ Religionis defensores ipsos ejusdem Religionis hostes ac persecutores appellant ceu testes constantiae et alacritatis fidelium in legibus ejusmodi observandis.

*Prob. III. Ex ratione.* In omni perfecta societate necesse est, supremam esse illius gubernandæ potestatem, sive in uno positam, sive in pluribus: atqui unus ex actibus potestatis illius maxime necessariis est legum latio; ergo necesse est, in societate perfecta esse legiferam potestatem. *Maj.* evidens est ex natura societatis; *min.* quoque ex dictis exploratam habet veritatem. Hæc vero potestas perseverat in christianis Principibus: namque Principes, cum se ad Christum adjunxerint, eo, quo antea gaudebant, jure non sunt spoliati: tum quia id minime æquum fuerit, cum potius reverentia et obsequio digniores per accessum ad fidem evaserint, juxta illud 1. Tim. 6. qui fideles habent dominos, non contemnant, quia fratres sunt, sed magis serviant, quia fideles sunt et dilecti: tum quia vehementer id obfusisset propagandæ fidei: tum quia inter Christianos perseverat potestatis istius necessitas, ut etiam observat AVG. L. 19. de Civ. c. 17. *politici regiminis finis est pax et concordia in rebus ad mortalem vitam pertinentibus, quæ pax etiam Christianis hanc vitam agentibus est necessaria.*

89. *Obj. 1.* Potestas legifera civilis vel est in *singulis*, vel est in *communitate*: non 1<sup>um</sup>. quia singuli non sunt cœteris superiores, nec quisquam ex natura rei habet jus imperandi: non 2<sup>um</sup>. alioqui leges ab universis ferrentur, quod inauditum est; ad hæc communitas neque a seipsa id juris habet, neque a Deo concessum legitur; ergo nullatenus est in omnibus ea auctoritas.

*R. N. m. quoad 2. part.* Homines ad socialem vitam a Deo conditi sunt: vitae autem societas nec commoda, nec justa, nec firma permanebit, nisi in unum finem et in unum corpus politicum conveniat frequens hominum multitudo: in ea multitudine non ordo, non concordia vigebit, nec finis communis obtinebitur, quin eidem regimini legibusque iisdem pareatur; ergo ex rei natura in communitate residet legifera potestas. Quia tamen hæc ab universa multitudine exerceri vix potest, ex communi consensu transfertur in aliquem unum, aut in aliquos vel plures vel pauciores pro modo ac specie regiminis, quod eligere placuerit; hinc

*R. Ad 1. N. seq.* Leges erunt proxime a Principe vel a Magistratu, in quem translata fuerit summa potestas.

*Ad 2. seq.* Ea potestas est ab auctore naturæ Deo, quatenus hominem fecit sociabilem, et societatem ipsam constitutam sequitur ex natura rei potestas ejusmodi; nec est necesse usquam scriptum esse, quod a natura ipsa dicitur.

*Inst. 1.* Sequitur, eam potestatem derivari *ex consensu singulorum*, qui in societatem convenient; sed hoc repugnat APOTOLO ad Rom. 13... non est potestas, nisi a Deo; repugnat et *rationi*, quia ab hominibus nequit esse auctoritas ulciscendi privatorum injurias, obligandi in conscientia, pœnis ipsaque morte mulcendi; ergo.

*R. N. seq.* Evidenter supponitur libera hominum potestas, qua in unam corporis politici compagem cocant; at constitutæ societati ex natura rei adhaeret legum ferendarum potestas, per hoc ipsum a Deo proveniens, quod homines Deus ad societatem aptos considerit, ad eum fere modum, quo

matrimonium non initur, nisi ex conjugis utriusque consensu, quo semel emiso ex natura rei divinaque voluntate talis existit vinculi firmitas, quae humana auctoritate resolvī non potest.

*Inst. 2.* Juxta hanc expositionem dicendum erit, communitatē nūquam supraēta et legifera potestate spoliari posse: ab hominib⁹ esse regiam dignitatem, non a Deo, et communitatē esse superiorem Rege: atqui *primum* adversatur experientiæ, et *secundum* Scripturæ; ergo.

R. *Ad 1. N. seq.* Potest enim communitas seipsam exuere illa potestate, et sui regendæ arbitrium transferre in alterum, sive per electionem capit⁹ alicujus, aut in tempus, aut in perpetuum, sive per spontaneam accessionem ad majus aliquid imperium, cuius legibus tanquam pars regi ac vivere incipiat; potest item in pœnam alicujus delicti v. g. injuste suscepti belli, ea potestate privari victoris arbitrio, et tunc censetur virtualiter consensisse in sui juris translationem, cum sese exposuit periculo eorum, quæ nata sunt sequi ex bello injuste suscepto.

*Ad 2. N. seq.* Nam potestas, quæ conceditur Regi, secundum se est a Deo *mediatae* (*proxime* autem, ubi Deus ipse Regem constituit, ut apud Israeliitas) quia sunt a Deo tum *natura*, quæ inclinat homines ad societatem, tum *recta ratio*, quæ persuasit efficere Principem vel Magistratum reipublicæ, a quo regatur. Quamvis ergo hominum fuerit, supremam auctoritatem sub hac vel illa forma determinare, et in hunc vel illum transferre; tamen posit⁹ eorum consensu is, in quem translata est, fit communitate superior, sicut homo fit homine superior, si hic illi in servum se venundedit.

90. *Obj. II.* Saltem Magistratus aut Principis arbitrium sine legibus erit sufficiens ad communitatē continendam; ergo necesse non est ejus auctoritati legiferam annexi potestatē.

R. *N. A.* Societas hominum *per se* diu constare nequit sine legibus, licet ex accidenti ob Principis alicujus virtutem et sapientiam ac populi exiguitatem id aliquando contigerit, uti de primis Reginis cogitari potest, et Livius L. 3. testatur de initiis reipublicæ Romanæ: quapropter legislatio, ut per se necessaria, regiae aut supremæ auctoritati annexa est.

*Inst.* Invigilant Principes *naturalium legum* observationi, et florebit respublica; ergo positivis legibus, earumque ferendarum potestate opus non est.

R. *N. A. 1º.* Quia in applicandis aut conciliandis nonnullis naturæ legibus occurrit interdum difficultas, quæ positivarum duntaxat legum determinatione tolli potest: sic oportuit definiri tempus, intra quod ii, qui rei ab altero possessæ dominos se contenderint, possent suum sibi jus titulis certisve argumentis demonstratum vindicare, et ultra quod bonæ fidei possessores pacifica possessione non possent exturbari: ne fieret aut contra eam naturæ legem, quæ vetat rei dominum invitum, aut sine justa causa spoliari; aut contra alteram, quæ prohibet, ne bonæ fidei possessores possent in infinitum dejici diurna et pacifica possessione, atque nullus litium sit finis.

2º. Quia sunt quidam usus communi bono valde conducibiles, qui ad naturæ legem non pertinent, ut feuda, census annui et similia, quæ humanis legibus dirigi necesse fuit.

3º. Quia lege naturæ nullæ temporales pœnæ sceleribus decernuntur, quibus tamen solis improbi solent coerceri.

91. *Observa.* In Imperio Romano-Germanico leges universales civiles fert Imperator cum consensu statuum: Status imperii etiam soli condunt leges seu statuta particularia pro suis territoriis; hinc jus civile dividitur in publicum et privatum.

*Jus civile publicum* de causis publicis ad publicam utilitatem directe, principaliter et immediate est constitutum: concernit sacra, sacerdotes et magistratus: continetur *recentius* saltem *Aurea Bulla* de electione Imperatoris et juribus Electorum; *Pace publica profana* a Maximil. I. an. 1493. stabilita, et a successoribus renovata pro tranquillitate publica, atque indemnitate Statuum ac subditorum Imperii; *Ordinatione camerae et judicij imperialis aulicii*, potissimum erecta ad justitiam Statibus ac subditis Imperii administrandam in controversiis a tribunali inferiore non decisis; *Pace religiosa* et Osnabrugio-Monasteriensis; *Capitulatione cœsarea* seu conventione, qua Imperator electus ante inaugurationis solemnia certas conditions sibi propositas acceptat juratus; *Recessibus imperii*, sive Decretis comititalibus, quæ sub finem comitiorum a Statibus et Imperatore concluduntur. Legibus hujusmodi publicis omnes Status imperii ac subdi obligantur, etiam Principes ecclesiastici, qui ob acceptas ab Imperatore in feudum integras provincias vasalli sunt. Atque ex his videtur Imperium nostrum habere formam Monarchie certis pactis et receptis usibus temperatae.

*Jus civile privatum* auctoritate Principis secularis conditum, ad singulorum civium utilitatem temporalem immediate, principaliter ac directe ordinatur. Plura de jure civili vide in *Tr. de Princip. Theol.* num. 240. et apud JCtos.

### ARTICULUS III.

#### DE POTESATE LEGISLATIVA ECCLESIASTICA.

92. *Nota.* Potestas vere legislativa dicit potestatem tum *præceptivam*, h. e. imponendi obligationem et obedientiæ necessitatem, tum *coactivam* in violatores legum etiam invitatos: nam sine hac illa nec utilis, nec satis efficax, immo futile esset gubernatio; unde Philosophus L. 10. Ethic. c. 9. docet: *lex est sermo ab aliqua prudentia ac mente profectus, vim habens cogendi*. Potestas iurisdictionis ecclesiasticæ alia est pro foro interno v. g. pœnitentiæ, alia pro foro externo ad gubernandam Ecclesiam, seu corpus Christi mysticum a statu politico contradistinctum; de hac duntaxat quæstio est, et quidem dogmatica contra hæreticos: nam præter AERIUM, WALDENSES etiam, WICLEFF, HUSS, LUTHERUS, ANABAPTISTÆ, TRINITARI, MELANCHTON, CALVINUS, MARSILIUS PADUANUS etc. denegarunt Christi Ecclesiae potestatem ferendi leges, quæ fideles obligent in conscientia, idcirco ab Ecclesia in variis Conciliis damnati. LUTHERUS adeo totum jus canonicum publice combussit: CALVINUS Pontificem et Episcopos dixit esse tyrannos et carnifices conscientiarum: MARSILIUS docens jejunia Ecclesiae non esse servanda, negat omnem aliam potestatem, quam prædicandi et administrandi sacramenta, a Christo concessam Ecclesiam, vultque clericos et Prelatos Ecclesiae jurisdictioni Principum quoad omnia subjectos. In Galliis nonnulli innovarunt eudem errorem, quem itidem secutus in Anglia HENRICUS VIII. edito libro potestatem ecclesiasticam